

澄城縣志

地 170.149

147

并 = 8

澄城縣志卷二十八

藝文七

朝議大夫掌貴州道監察御史姚公墓志銘

陳嵩慶

廉山御史既歿之明年將葬其子敬之奉狀來謁乞志銘余以年誼不容辭謹按公姚姓諱堃字子方號廉山居長澄城人六世祖肅規舉人廣東順德令高祖許封挨貢曾祖瑾士簿祖性郡增生以景州公貴

封奉直大夫考廷儀順天舉人直隸景州刺史

晉封朝議大夫妣侯宜人

晉封恭人公生而英俊有志節六歲叔父南圃孝廉督課家

澄城縣志

卷二十八

藝文七

一

塾日授千言輒成誦十八入庠如京師從羅碧泉先生遊學益進己酉選拔庚戌

朝考第一授成縣訓導以文品見重於周廉堂學使王子登賢書春闈薦不售棄職留京攻苦忘寢食遇異書及名家手筆購之不惜重直室如山積行必以隨乙卯景州公攝開篆自都往省載書軸數十笥景州公命安置外堂人士聚觀傳爲盛事丁巳景州公卽世毀瘠骨立扶櫬歸杜門終制辛酉成進士入翰林尋改主事後十年游陞郎中擢御史鯁直敢言

優恩獎勵所奏如請查拿役滿書吏毋得留京滋弊增補驛馬缺額毋得輪派各鄉陝漢毗連川楚深林密箐易於藏奸

請飭該撫嚴行盤詰等疏三年之中次第敷陳悉蒙
嘉納時太恭人春秋高屢欲陳情終養以有盡心乃職無以
我爲念之命不果嘉慶二十三年奉

命巡視北城釐剔不怠內外肅然會以甲乙事望悞或白公
寃長官曰子方能謁我事無害或以告公正色曰受爵王朝
謁人私室子方不能也後數月竟以事左遷時論惜之方其
供職於朝也政事之暇畱心翰墨求書畫者日填門公樂應
之不少倦評家謂其書法備顏歐畫法在南宮大癡閒殆非
諛論平昔鑒賞精確議論宏富下筆千言立就見者聞者靡
不歎服辛巳攜僕遨遊天下壬午遷京謂余曰吾此行覽山
川之勝結詩酒之緣於斯道大覺有進蓋又得江山助云五
澄城縣志

卷二十八

藝文七

二

月歸省居數日以弟堅監關中講院西赴之尋卒著有周官
識小錄關中風俗攷子史雜識咫聞錄茅屋瑣碎錄隸書補
正詩賦雜文若干卷嗟乎以公之才積學數十年使得大用
於世以佐

昇平而樹隆業必將有不愧於古人不負其生平者乃限於
天年竟以是終豈不惜哉公生于乾隆二十七年九月二十
七日寅時卒于道光二年七月初二日酉時得年五十有七
誥授朝議大夫配張氏

誥封恭人大荔處士潔公女孝淑慈良先公九年卒寄葬莊
南公自作內傳生子二敬之增生候銓縣丞義之業儒孫男
二研郎肖郎俱敬之出女二長適大荔庠生路瀛洲次字蒲

城原由義未嫁殤今以道光三年十二月二十七日巳時葬公於莊東祖塋左次遷恭人祔焉銘曰美富于才天實予之而齊於遇誰實沮之學窺鹿洞名在烏臺依依乳羅想望丰裁迫前人光詒後人穀美哉斯阡祥發秀毓

朝議大夫掌貴州道監察御史姚公神道碑

鄧廷楨

君諱莖字子方號廉山陝西澄城人也先世自山西遷居於縣之業善里世有隱德門垂義方徵諸鄉評載在家牒曾祖諱瑾祖諱性翬翬穆行情愔德心以其餘慶式光來葉考諱廷儀以乾隆丁酉拔貢生舉癸卯順天鄉試爲直隸東明西甯無極宣化等縣知縣擢知景州不詔吏才勤恤民隱賑饑

澄城縣志

卷二十八 藝文七

三

侔夫河內美俗比於中牟遇

覃恩賜贈祖考奉直大夫如其官妣皆宜人君幼而開敏長益通博試銅雀之詠九歲知名覽藥市之書五行俱下補廩膳生乾隆己酉選貢成均

朝考以教職用借補階州成縣訓導明山賓之淵懿堪作學官元行冲之徇通願爲都講執費問字匪獨侯芭稅薪炙硯軍資顏斐受知於學使周公兆基命從學焉以皋比先生作河汾弟子咫聞日擴馨譽彌遠壬子舉於鄉座主爲羅公修源羅故景州公房師而君所從受業也黠參兩世親聞鼓瑟之聲鏡樹一偈遂成傳燈之錄方之曩事尤爲佳話嘉慶辛酉成進士改庶吉士振奇於培英之地掩雅於選雋之場談

雞次之典則黼藻九流誦龍威之篇則琴箏六藉一時翹秀
夾視而服士衡三館尊宿傾襟而禮庾乘散館改車駕司主
事稍遷職方司員外郎存遷郎中兩都分簡實詔西曹五戎
握筦厥惟南省君乃記兵儲而威備對簿領而不遺騰聲法
樞動色武庫改江南道監察御史轉掌貴州道巡視北城行
行避路驢馬沐其霜威子子立朝神羊瞻其風采會銓曹吏
有罷役而猶預部中事者君劾奏之論如法貶鼠五技喪膽
於磨磨狡兔三窟側目於鷹隼尋以事呈吏議降一級調用
需次京邸久之不除君篤念烏私馳情鶉首省北堂而促駕
奏南陔以戒行方將誦長統樂志之章述潘岳閒居之賦而
乃巫陽遽下殄瘼莫斟以道光二年七月初二日卒於西安

澄城縣志

卷二十八

藝文七

四

寓舍年五十有七用未竟才位不副德凡諸赴告罔不盡傷
君內行深醇天懷抗爽交無城府寫幽篋以琴心行不脂韋
發慨慷於劍氣所著有周官小知錄秦中風俗攷及隸釋補
正諸書河間蠶簡頗陋劉歆風土麓編遂儷周處雖劊劊之
有待幸滔繩之未涇儒者立言期諸不朽矣配張宜人先君
卒子二敬之義之能讀楹書克守家訓肩吾之門有信枚乘
之後生皋將以某年 月 日葬君於 山原而屬余文其
引紉之碑延植與君蕊榜聯名柯亭接席爰託豪翰敬述徽
言匪言稱衡之才筆不加點庶幾蔡邕之志文無媿辭銘曰
大華蒼蒼河水湯湯駕生詰士鬱爲時望蜚英秋林振采文
罔旣登瀛洲旋應列宿拾遺補闕嶽嶽拄冠不茹不吐色正

芒寒北邙奄歸南溟未運豐吝之故搔首誰問死生契闊義
璘屢遷青松今日宿草來年魄闕幽宮書存手澤履綦不沫
視此貞石

新建試院記

代韓介侯作

朝邑張佑

自隋唐以科舉取士鄉舉里選之制變而爲考試衡文之法
棘闈鎖院歷代皆因之不改然唐宋之時所致嚴者各處鄉
試及禮部省試而已其選取學官弟子尙未嚴定爲關防也
明初仿唐之舊府州縣各設廩膳增廣生員著爲定額廩膳
生員缺額則以增廣生員選補增廣生員缺額選民間俊秀
以充其巡按御史及各上臺巡方所至有觀風考取者亦以
待補增廣生員之缺正統元年始置提督學校官專司其事

澄城縣志

卷二十八

藝文七

五

十年始命天下提督學官考取附學生員其增廣生員缺額
卽以附學生員選補沿至今不改凡遇歲科兩試府州縣官
先彙集各應試童生預行考校汰其文理荒謬及曳白不能
完卷者以進之於提學官提學官始鎖院考校選取如額略
如禮部試及各處解試之制於是天下各府及各直隸州皆
建有試院以待提學官之至而州縣之試院則多未議及也
澄城爲陝西同州府之屬縣地雖褊小而絃誦之士所在多
有每縣試時應試童生幾及千人悉扃之於縣署覆以席棚
所需几案皆士子自備借之鄉村夫宋之試院寄於太公廟
議者已訾其非待士之典况風簷寸晷中人人各思自展一
日之長或牆垣有隙或風雨驟至一席之蔽豈可棲身而欲

其苦心構思有一片承平雅頌聲也不綦難哉嘉慶庚辰伍使君來蒞茲土爰集闔邑紳士而謀之紳士退而謀諸各鄉里各鄉里皆踴躍從事每一里贖白金二百兩凡四鄉四十里計贖白金八千兩擇得城中察院舊署卽於是歲冬庀材鳩工至明年道光辛巳落成其年秋予與白遜齋敏同忝膺鄉舉次年予成進士歸將捧檄赴官山左諸紳士以記見囑予惟致治之道首在得人今取人之法有進士有舉人有貢士而當其初皆起於學官弟子選學官弟子又必先之以府州縣試是學官弟子者士子進身之始基而縣試者又爲學官弟子之始基也

聖天子定扁闈衡文之制原欲遴選眞材使士子志聖賢志澄城縣志

卷二十八

藝文七

六

言聖賢言以收立德立功立言之效今使君仰承

聖化下車伊始卽創立試院不惟關防得以嚴密且使士子伏案構思克盡一日之長行見澄之人士從此爭自濯磨於進身之初卽知砥礪廉隅文運且蒸蒸日上以仰副

國家作人之雅化也豈不偉歟至於地基若干畝房舍若干間以及督工紳士姓名具見於伍使君所立碑陰不復贅也伍使君名敏四川渠縣人道光壬午十月

韓榴園墓志銘

張佑

予爲諸生時每以學使者至就試郡城因得盡交吾同郡知名士澄城有韓君榴園者以乾隆辛丑與予同受知於學使者此後歲科兩試予累廁吾朝邑前列而榴園於澄城列高

等者七冠諸生者四在郡城不時過從歡相得也榴園諱伯熊字命九先世家相州爲宋宰相魏國忠獻公之裔元末有官國子祭酒永者自相州遷洪洞永之孫有文秀者當明之中葉又自洪洞遷澄城故今爲澄城人七世祖一偉六世祖紹武高祖敬承曾祖嗣禧四世俱庠生祖曰魯例贈修職郎父念祖恩貢生注銓教諭贈文林郎本生祖曰愚父繼祖例贈贈修職佐郎韓氏自魏國公以後代有聞人在洪洞者尙書忠定公文爲前明一代名臣在澄城者有懷先生一良起家進士歷官給諫以直言超擢都察院僉都御史事在明史列傳卽榴園之七世叔祖也榴園生名賢之後負不羈之才又有厥考贈公督課之勤諸先達鉅公見之咸謂掇巍科登

澄城縣志

卷二十八

藝文七

七

顯仕樹功名於天下自屬指顧閒事乃應鄉舉十餘次五薦不售年至五十始以積廩充鄉貢是何其文章憎命達竟不能與時爭衡耶榴園自弱冠入庠卽以家貧館穀養親迨贈公卽世所生父又失明不得已身肩家棟薄田十數畝餽粥不給待哺者滿家索債者盈門兼以連罹憂服荒旱頻仍荼苦艱辛殆難名狀而益自刻勵從不少輟讀書功爲文章苦心孤詣戛戛獨造非不揣摩有司之所好尙以赴當世功名之會者何天之屈抑之困阨之卒使之懷才不遇若斯耶榴園有弟介侯名亞熊少榴園二十二歲生十四年而喪怙飲食教誨惟榴園是依嘉慶壬申子謁告旋里介侯已食餼於庠次年癸酉以選拔貢

大廷既

廷試報罷奉榴園命以文來就正於予予與介侯有僚壻誼固辭不獲命榴園謂予曰吾一生數奇不偶惟望吾弟得有成立亦可慰先人於地下言之聲與淚俱及道光紀元介侯連舉鄉會試出宰百里騰驥仕路當進取無量忠獻忠定有懷先生之事業何一非男子之所有事哉是榴園之不遇於時與天之所以重困榴園者將以成介侯之材而非有榴園則介侯之學殖亦無以培其基也榴園亦可以無鬱鬱不平之憾矣平日處己待人_{不爲崖岸亦不爲疾言遽色而中甚}耿介非素心人無有深相結納者教後生小子情意肫切人之遇之如在春風和氣中以半生困苦積久竟成痼疾而好

澄城縣志

卷二十八

藝文七

八

學不厭年逾六十猶日坐家塾課諸子誦讀有來請業者猶諄諄訓誨無倦容同人有憫其老疾勸之輟業專以頤養天和者則笑而不應是果以終身不遇而不能忘情於是哉抑自有樂此不知疲者耶年雖老病雖深志之所在神明終不少衰也元配王邵陽處士宗緒女繼配姚同邑處士煥女稱未亡人男四人汝梅業儒慶餘庠生爲其從叔父銳熊嗣俱王出大東汝諸俱姚出孫男二桐孫起泰有女二人孫女二人榴園生於乾隆壬午洎道光乙酉年六十有四矣時介侯方攝篆沂水行當赴任榮成諸同人以榴園茹苦有年今得介侯祿賜之入可以爲晚歲之養也將以二月十一日載誕之辰爲一舉初度之觴予與榴園相知四十年繼又以予

第三女妻介侯子瑞東重以戚誼擬爲文以致祝而榴園竟病不及待以二月七日卒也今將於某年月日葬某阡以元配主祔因採錄行狀參以昔所爲致祝之文更修飾之以誌其墓而系之以銘銘曰豐於才嗇於命苦其身勵其行以動心以忍性人定者勝天將與造物者是競不於其身且於其舅弟於其子孫維榴園其何病

姚節婦彭氏傳

張佑

姚節婦彭氏澄城大學生姚維繼室也幼有至性父大學生毓和鍾愛之年十七歸維維之高祖肅規順治丁酉舉人廣東順德縣知縣曾祖許擎大學生贈修職佐郎祖雲會歲貢生隴州訓導父閻拔貢生兄弟三人伯庠生雄仲大學生雒

澄城縣志

卷二十八

藝文七

九

維其季也少失父母鞠於繼祖母趙節婦之于歸也趙年已八十委曲承順能得歡心越二年趙卒又三年維又亡節婦集姚氏族衆暨內外姻黨昌言曰死者人之所必不免未亡人今榮榮無依不難捐軀以明志但念吾夫世業詩書簪纓相繼祇以生有宿疾弗獲肆力於學賫志以沒并且殞後所不瞑目者惟期承繼有人得延書香一綫耳未亡人不成其志何以報亡夫於地下遂撫雄次孫安之以爲孫嗣安之年方五齡飲食教誨備極勞瘁家又中落安之旣長困於衣食爲童子師藉資饗飧生有兩子勉餘慎餘皆聰穎勉餘尤勤敏好學善屬文有雋才負笈從師之費皆節婦紡織以給及勉餘登嘉慶丙子副榜有司亦以節婦苦行上之

子表厥門閭潛德幽光得以大顯而勉餘不幸又亡節婦
既再遭此閔凶而志終不替六十歲後猶中夜紡績以其所
入供煨餘膏火之資其望慎餘學之有成猶無異當年屬望
於勉餘時也以道光辛卯卒享年七十有四計孀居凡五十
有三年

春洋子曰澄城姚氏子先大父之母族也維之高祖曾祖卽
先曾大母之大父及父也安之之本生大母又子之姑氏也
維固子表叔父行其亡也子往會葬一少年嫠婦攜五齡嗣
孫孤苦伶仃人人爲之隕涕旣而家又中落猶能致孫曾兩
世皆成立讀書種子且不至中絕其五十年茹苦飲辛殆有
不堪名狀者矣維有子人驥早亡妻馬氏年十九而寡苦節

澄城縣志

卷二十八

藝文七

十

撫嗣子亦五十年今勉餘妻李氏亦年二十而寡尙無有爲
後者十餘年來與節婦相依爲命吾鄉數婦德之多賢必推
姚氏詩書之家家範固殊禮義廉恥之風其所漸磨者深矣

伍明府創修考院序

代姚子方作

郟陽

張壩

粵自名題蕊榜聿開射策之科闡設棘垣首重掄材之地故
雙團紫筍煎茶傳試院之陞千朵白蓮燃炬煥分廊之彩而
特以

朝廷取士眞材旣拔於風簷童試衡文下邑徒嗟夫露處斯
又法非盡善政有攸關者也維我邑侯伍明府楚相名宗蜀
都望族起家蘭錡曾投筆於丁年擢秀芹宮遂請纓於甲帳
靖褒斜之梗披堅而首逆先擒舉汚漢之旗論賞而頭銜載

錫冠輝聚鷗永爲西時之干城烏訝飛鳧爰作北徵之保障
則見澤鴻安堵百廢俱興魯雉馴郊千家樂業雨我則車隨
甘雨風人則扇播仁風閭閻有召父之稱學校繼文翁之治
師延鹿洞方擁簪於經壇士育鷺湖遂庀材於考院於是謀
之龜筮衆志僉同合以鳩民輿情允協樂輸將於丁籍公庭
則不選一錢効踴躍以子來草野則咸歌五袴億萬姓窮簷
之隱歡若雲從數千閒廣廈之庇成堪日計是固屬衆庶經
營之力抑豈非賢侯區畫之周哉堃廿載鳩行備員日下一
時虎渡引領風前沐惠澤於棠陰戴仁天於枌里適以公車
之集竊聞鼙鼓之興惟衆口之爲碑早私心而成頌夫事莫
難於創始政在有爲力不憚於頻勞功期永逸迺承乏者輒
澄城縣志

卷二十八

藝文七

十一

如傳舍旣歷任而莫成牧民者指爲畏途復經年而未就而
我邑侯以向來之成議創未有之洪規攸芋攸甯引仔肩爲
已任勞心勞力併執掌之辛勤雖米鮮折腰五斗無需乎分
俸而民無頽尾萬金不病於集裘烏斯革而翬斯飛共躋春
臺濟濟美哉輪而美哉奐同依夏屋渠渠此卽扶隋帝之泉
莫盡恩波汪濊磨鄭公之碣難銘德政涓涓方今

聖天子壽考作人膠庠造士花栽潘縣無非桃李之英絃奏
武城羣仰菁莪之化佇見人文鵲起當蓄萃於龍泉卽今科
第蟬聯已蜚聲於鶉野又豈徒美漁陽之政樂不可支聽叔
度之謠來何爲暮哉

創修澄邑考院碑記

代伍燮堂作

張墉

古者教士必有其時如春夏教詩書秋冬教羽籥是也養士必有其地如夏有校殷有序周有庠是也至唐始立學舍三百餘間內設三館以處貴胄外設六學以育俊秀宋又設五學以分教法立六齋以訓宗戚其所以創經義之科開詞學之路者意美法良于今爲烈然皆爲造士計非爲選士計也自我

朝設科以來于會試則有禮闈于鄉試則有鄉闈卽下逮各郡于學使科歲試亦莫不各有試院而獨于州縣缺如余仕陝將及廿載若宜川麟遊西鄉等處每見試童子時悉肩于署中令士子自備几案一遇寒冬盛暑不無露處之虞嗟乎寒士青燈備嘗辛苦幸逢選士之時方思各盡所長以爲出

頭地乃於風簷寸晷求廣廈不得使滿腹文章弗能及鋒而試王文正公謂科目之嚴足以塞天下賢豪之路豈虛語哉余忝叨司牧心惻者久之庚辰初夏蒞茲邑詢及考試情形較他邑士子更苦緣城隅褊小比戶無多所需几案悉借資於鄉鄰臨期於署中搭棚若干間或牆垣有隙僅以片席覆之不特耗費民財抑且關防不密又何以抒民力擢真材也夫以牧民之官首崇文教子旣於玉泉書院延師訓課鼓勵士風考院不修職子之咎方欲與都人士勸捐公建適紳士王進士振江等公呈懇請以需費浩繁必商同四十里按糧攤捐方克有濟而厯任諸公咸以工繁費鉅圖始爲艱遂不果余謂此甚盛舉以百姓之輸將公之一邑之士庶且此地

英賢代出學校如林則選士掄材尤爲地方急務爰集各紳士妥協商辦不逾月而湊有成數維時採購木植者則有州同同建仁監生連君錫監工者則有廩生某某等自朝至夕不辭勞瘁其分司各事諸紳士及里長等均皆踴躍急公度支一切悉歸實用不惟規模冠冕亦且工程堅固足垂久遠竝詳明各憲立案均予褒嘉是年恭逢

恩科鄉試登賢書者韓選拔亞熊白廩生敏明年韓孝廉聯捷禮闈豈非地靈人傑之驗哉將見人文薈萃士庶深淳雖未敢媲美於教士養士之休風而蓮輝千朵燭唱三條亦足庇一邑寒士之歡顏而爭鳴

國家之盛事也詎不懿歟是役也興工於嘉慶二十五年冬月落成於

澄城縣志

卷二十八

藝文七

三

上御極之元年所有工釀銀兩及地基房間若干悉載碑陰其經理紳士及里長等業經稟請分給匾額以示獎勵而姓名亦臚列青珉以垂不朽是爲記

創修演武亭碑記

代伍明府作

張 墉

粵自芒垂玉弩九天騰武庫之光鞏固金甌萬國重干城之寄是以學詩書於春夏邑必有庠教振旅於秋冬鄉皆習射匪曰任烏號之勇猶然賡狸首之遺余西蜀從戎已逾十載北徵作宰洵及三年試院聿新創起衡文之地繚垣猶就尙無講武之區爰議鳩工共籌鴻樹相其遺址構爲廣庭無煩爽塏之更壯飛翬於夏屋藉得平原之勢待盤馬於秋郊金

姑高張好在綠楊影裏雕費宏啟平連紅樹村邊卽此庀材
允爲得地嗟乎詩吟板屋關西當鶉火之墟績奏玉璜渭北
仰鷹揚之佐當此

聖天子神聖文武象叶飛龍獮狩蒐苗政垂司馬行見掄材
兔冒用爲相圃之觀庶幾起化騶虞仰副澤宮之選是爲記

創修蔡家河惠濟橋碑記

路文秀

水利之興自三代以來關中豔稱鄭白渠然李錫之泉變爲
甘榮陽之渠號爲殷政蹟昭然未始不芳垂後世利溥閭閻
邑侯伍公涖茲五載於邑中事務缺者補之廢者舉之而尤
以教養爲急若整修書院建立考院諸政人文鵲起屢著明
徵近於勸農之暇謂沿河居民何不引水灌田以收水利遂

澄城縣志

卷二十八

藝文七

十四

捐廉覓工製造水車並鑿井取水導以澆灌之法因縣西蔡
家河有溝橫截溝西地畝難獲水益復相度地勢設法開渠
築橋渡水俾溝西各地就近取不盡而用不竭於是庶民子
來不日成之此固蔡家河人等議之數十年而不能就者而
邑侯慷慨捐資損上益下不數日而董其成其功雖在一方
其仁實足以及數世匪特享其利者羣頌神明而士庶人等
亦咸欽有補於文風卽後之治斯邑者且將奉爲規模而勉
爲循吏也不且與鄭白二公並傳不朽而李泉殷渠又烏得
專美於前也故是爲記道光四年八月

重修明倫堂碑記

武威
張儲文

學校所以明倫理育人才廣教化美風俗也戊子冬十月望

之日余奉檄蒞澄學至之日遂接篆於其學之明倫堂肅國
典也已迺周而視之則屋瓴檻楹煥然一新蓋欽仰者久之
越明年邑孝廉路子文秀袖其事狀來以示余曰學署之制
由來已舊前署篆車金二邑侯相繼來臨憫學之廢久而荒
也未遑他務以明倫堂爲學之本首舉重修因其基址易其
棟梁增其瓦覆甄花堂之廣度以筵屋之崇量以仞室之深
淺奧阼正以陰陽晦明之向背於是圮者起之傾者正之朴
者丹之墜之黜之而藻繪之斯堂乃崇卑合度文質彪炳遂
赫然而爲吾澄之一巨觀云是役也經始于道光丁亥某月
落成于次年之某月車邑侯始之金邑侯終之而督其事者
則員外郎東翁榮震兵馬司石翁上珍進士王子振江優生

澄城縣志

卷二十八

藝文七

五

員楊子質武武生同君萬選監生連君正元而秀亦與其役
焉其資費共計若干則又闔澄之善士庶樂趨而義捐之者
也秀慮其久而湮也不可以不誌敢以煩吾子余覽其狀不
禁蹶然興曰美哉二邑侯之是舉蓋文翁化蜀之意而諸君
子勇於從善遂能相與以有成也余惟

國家太平日久教化旁敷膠庠造士海隅率俾澄雖僻壤同
沾雅化竊意歲進人士登斯堂者魚躍鳶飛共遊網紀追金
琢玉並重瑚連竚見聲名文物之區釀成仁讓醇厚之俗則
敦禮樂而說詩書意在是乎意在是乎此則二邑侯之志亦
卽諸君子之志抑余忝居師儒於此有厚望焉車邑侯名稱
字漁村金邑侯名在紳字笏山其他政治載在口碑者此不

贅是爲記

雍地漆沮述

白玉山

大凡名之同者則稱謂易訛而地相近焉其舛錯尤甚此雍地之漆沮所以諸說紛紛歟間嘗考之於古證之以今亦謂雍地有四漆沮而實三派非臆說也而要不敢概襲前人之說者何也按說文云漆水出杜陽縣岐山東入渭程氏曰杜陽縣今普潤縣之地亦漢漆縣之境源遠流長潏洄於數縣之境禹貢雖指謂扶風有二漆而無沮蓋指普潤縣爲一又據漢漆縣復別爲一殆一而二之歟詩曰自土沮漆卽此漆也而沮其卽從洛之沮乎水經云沮水出北地直路縣北東過馮翊破祿縣北東入于洛馬朴同州志亦有洛水經中部

澄城縣志

卷二十八

藝文七

去

合沮之語水經注執破祿之故城說成耀州合流之漆沮矣地理今釋謂漆水出同官之北高山沮水出中部西北子午嶺至耀州合流爲石川河南經富平縣又南至臨潼縣交口渡入渭近志皆從其說乃寰宇記雍錄皆謂注于洛說者謂古今水道遷徙安能歷久而悉合如從洛之沮漢志歸德下云入河襄德下云入渭此其彰明較著者也特是鄭氏漁仲敘地理略亦有漆沮自富平入渭之說詩曰漆沮之從書曰漆沮旣從惟此足以當之詩註書傳皆以洛爲漆沮不知何所指也夫先儒博學明辨其所以昭示後人者蓋亦何所弗及也顧可妄行詆毀也哉庸知志地與說理不同理可深思而窮其極者地非親歷弗得其詳也是以兗州之沮九域志

謂在濮州沮溝分錯非如污水名沮僅以見於梁州之域窮其源於狼谷竟其委於沮口爲易易也故以涇東之漆疑爲涇西之漆者則有康德涵以合漆之沮誤爲從洛之沮者又有韓汝慶雖生長其地誤且如此況其餘乎余學旣疎不敢言考而才又淺安能爲辨幸生諸儒之後得旁搜博採姑述之以備參觀

韓若谷先生家傳

上元 梅曾亮

先生韓氏名念祖字若谷陝西澄城縣人五代時王鎔書記和馬彧詩名定辭者有弟昌辭居深州四世至忠獻公琦居安陽元至正間遷洪洞又二世遷於澄城祖嗣禧父曰魯先生幼學於叔父每耕必攜往坐隴上讀書年十四以默寫十

澄城縣志

卷二十八 藝文七

七

三經應試爲縣學生所爲四書文清醇無世俗氣屢試不得舉然不以自悔也事叔父如父撫其子如同生及姑姊妹存歿皆有恩族有訟諭之輒罷非公事未嘗至官府及貴富人終身不識其門巷善醫工詩文應人之求而卻其謝饋惟勤於開益後學經其指授者蓋數百人焉年六十以恩貢生終娶馬宜人再娶袁宜人長子伯熊歲貢生以弟子後次亞熊進士官膠州知州贈如其官

梅曾亮曰余少時見諸老先生温温然不以學問高人習五經傳註惟功令所定者而已然經文無不成誦者其後則論益高辨益博而經或荒矣夫

國家定功令非以學不可加於是也矯爲難而先失所易則

慎矣先生爲童子時其風氣固尤近古哉

袁宜人傳

梅曾亮

宜人袁氏韓若谷先生妻也年十八歸于韓生子亞熊祖姑寡居性嚴毅而姑范宜人失明宜人侍祖姑食畢以匕飯其姑而後自食數十年未嘗失祖姑歡歲嘗饑市絲織布復以布市絲取其羨以佐食同堂之子女其衣服煩擱事皆身任之及婚嫁於心無不盡者終日理米鹽水漿無少暇然兒自塾歸猶夜課之一日怒曰兒謂我不知書耶今所誦何猶前日書也將與杖兒自以王制中有複語乃已袁氏本富室後貧以贈嫁時物悉歸之曰本兄家物也年五十而卒內外人皆哭失聲數十年後猶稱袁姊賢蓋韓與袁世爲中外姻家人咸稱姊不以媿云

澄城縣志

卷二十八

藝文七

六

梅曾亮曰余同年韓介侯卽宜人子名亞熊者也宜人病猶命誦於旁忽語子曰吾今日聞書聲心甚煩可無讀也是夕遂卒介侯流涕言其時幼不知其言之悲也可傷也矣

王進士家傳

朝邑 李元春

王進士名振江字迴瀾號竹亭陝西同州府澄城人也其九世祖寵以選貢官教授後多補博士弟子者高祖肱曾祖琬皆業農而豐財施粟賑荒縣公屢榜其門祖賢類爲貧戶完輸納又嘗焚千金券以齒德舉鄉飲賓有二子利居利仁皆生員利仁進士父也利居無嗣以利仁次子九江後之進士甫十齡父旣沒從其叔祖學應童子試輒前列乾隆乙卯章

桐門相國督同試以第一入邑庠旋食廩餼嘉慶癸酉中本省鄉試第七名再赴公車甲戌備薦不售己卯春試前夢至一大官府設二百餘宴肴蔽紛列主席者撤一碗與之曰此汝飯也已而果得第

廷試後引

見

圓明園

賜佩文詩韻一部紫微宮緞二端蓋異數云進士少聰慧然勤於學身爲家督事繁如蝟毛常入城市爲食指計每於道途中默誦經史遇親友或時若弗覩入夜扃戶篝燈往往達曙不寐以故卒有成就嘗試春秋夏五題綜會前人說學使

澄城縣志

卷二十八

藝文七

九

者指爲老宿課子弟讀書不令一字謬恆誦功崇惟志業廣惟勤二句以語之曰吾生平佩此不忘汝曹母虛擲歲月也性孝友痛早失怙居祖父憂雖沖幼哀毀如成人事母李終身愛敬母旣歿與弟九江哭踊幾滅性莫葬一準乎禮遂匍

匍請

旌建坊入祠弟九江始從學有微愆夏楚無少貸或至流涕不能已與從兄同居數十年懷畏退讓見於形容爲禦外侮赴湯火不恤也素豪飲未嘗愆於儀耕穫必躬履凡家中事非親檢點則不嫌服御飲食自甘淡泊待師友則情文兼至遇無狀人不少假辭色而喜濟困厄曾與某白鏹以千計其人後昧金終弗明言鄰堡有孀婦貧甚贈之金以勵其節所

爲事敦厚符義多此類其爲文章必期壽世卽尋常碑志有求者亦不肯視爲應酬苟且試筆所著有槐堂私藁未刊也進士本有用才選期至部文已下而進士遽死年僅五十三未展其蘊人咸惜之子六詢虞郡庠增廣生爲從伯父嗣詢說詢範詢牧詢官俱業儒寶官時尙幼

桐閣外史氏曰予往時未識進士十年前遇於同州郡城時進士子詢虞與余子來南方俱入庠因講世好然自此遂別不得時相見故進士行誼之詳無緣具聞庚寅冬以府試復至郡詢虞訪至舍問其父沒三年矣次日詢虞與其弟詢說具禮來且持狀請爲父文子閱其狀可傳也乃據狀爲之家傳抑予傳進士別有感焉者進士之狀其弟九江爲之詞旨

澄城縣志

卷二十八

藝文七

三

悽惻若不勝情非進士之孝友有以感之能如是耶古人處兄弟間如牛吏部不能免射牛焚車之虐此類甚多且勿論向讀漢陂集見所爲其弟副使九峰誌知九峰自讀書入翰林皆其兄教之顧卒與兄若參商將死始自悔乞兄志而漢陂之誌亦不能掩其釁令人歎天顯鞠子之情名教中上或不如道路此必歸咎一人亦難言之今九江之狀其兄如是進士友于弟信矣其所言他行無飾詞概可知也子又思往見進士言動爽豁語予曰關學必君振之已予刻王山史周易圖說述其底本乃得之進士刻成予寄語進士惜此書人多不解進士曰人自不閱耳予於此並見進士之學焉君子論人自有微識不待求之輿情予傳進士亦云至予與

進士訂交一時而別已十年乃爲蓋棺之文念人生聚散離合於此更不禁愴然已

學博任莘田傳

李元春

莘田任姓名仰伊澄城人窮經篤行君子也嘉慶丙子舉人仕城固縣訓導幼時其父大學生鳴雁口授小學四書及詩書易入庠後家有藏經注缺不完借學官書日夜校讀月易一函常達旦不寐兩歲盡窮其義遂至病目然自是以通經著名郟陽鄒天祿經師也尤深於禮經五禮通考諸書無弗究治莘田時就正天祿亟推之應科歲試輒列高等督學陸有解經不窮之目繼由博反約潛心性命之旨徧閱儒先書有見卽題簡首細字密書幾不能容嘗語其子曰人可一日

澄城縣志

卷二十八

藝文七

三

不作文不可一日不讀書值試期惟爲講經史古文唐詩不知者或笑其迂又嘗曰文章以龍門爲先此外歐陽五代史他弗能及凡讀史以佐經取歷朝比較之治亂興亡瞭如指掌持身應物服官從政皆有資焉吾以讀經病目讀史仍復瘳觀諸經亦益明書之牖我也多矣始莘田年十三遭母葉喪廬次讀戴記手鈔喪禮一冊兢兢昉其意而行之後喪繼母權亦然父老患嗽血不飲藥莘田閱本草經擇和榮衛足充食飲者爲朝夕餐未半年痊自是不應禮部試十餘年侍父跬步弗離父旣沒以覓椁材葬不時冬月衰絰不爐不裘三年不御酒肉不出里門及營窀穸不徇俗一一酌士喪禮諸篇行之莘田無兄弟有姊適張貧姊婿汝翻久困童試勸

之堅其志得爲茂才子公燕從莘田學飲食教誨與莘田子同居八年亦列青衿女曰荃授女誠閨範諸書以汝嗣食貧力學字其季子大均女弟適李氏而寡家亦中落撫其孤至成立從弟志伊爲諸生未久夫婦相繼卒遺孤數歲無所依攜之城固署見之者疑爲莘田少子師事邵陽雷香晚廷蘭香晚後與莘田同榜鄉人傳爲佳話香晚沒莘田方居父憂聞訃伏苫大哭衰絰奔弔禮也同邑張蘿谷先生肥遯洛濱著述甚富莘田命其子請於外舅戚連孝廉毓太爲捐梓二種尋商諸邑紳公舉鄉賢其表微闡幽扶翼風化類如此在城固與教諭王蔭三樹槐共事六年誼如兄弟王升去揮淚別莘田竟卒學署子葆貞葆淳葆貞庚子舉人承家學亦深

澄城縣志

卷二十八

藝文七

三

經術與弟葆淳皆受業蓋屋路大史閔生德憶父命名意律身以禮路大史志其父墓子因哀次爲之傳

論曰韓子言士不通經果不足用抑非特不足用舍經尙可言學哉通經又未有不通史者也漢儒經學尙己康成醇儒後世尊之則亦以其行也惟敦行始不愧經術然近言經術者或尊漢儒而薄宋儒予殊不以爲然宋儒如程朱言心性言理此乃經術之本背理則無行無行若馬融直不足爲康成師矣尊漢者以宋儒爲空疎程朱豈空疎者耶予向不識莘田觀其學與其爲人恨不相見與之上下其議論且其砥礪訂忘年交也爲之傳亦誌心契耳

君諱毓太字仲初號雪峰世居澄城縣南鄉酥酪村父成庵公以力田致富而訓子極嚴君幼時卽延訪知名士爲句讀師先與師約日課無得曠師如約乃就館一日里人賽神演影燈戲師夜往觀之明日成庵公知之將召戲者演于塾請師坐觀師大慚謝過願杜門不出公乃止後師舉孝廉語人曰吾少耽遊戲志業不專及館連氏家終日伏案始猶知書味連翁吾嚴師也微翁吾其敗矣君稍長聞邵陽康力齋孝廉設帳于家成庵公率以往年十七應縣試歸成庵公問其名次對曰十七公怒曰吾邑額止十五汝名列額外耶執鞭逐之君卽日奔力齋家下帷自奮明年補邑庠會成庵公初度乞假歸甫出門而成庵公乘羸至問奚往日歸歸何爲曰澄城縣志

卷二十八

藝文七

三

祝嘏公以鞭指路旁地厲聲曰卽此拜祝君拜訖公趣令入塾曰後非奉吾召雖師命不得歸辛酉科試學使宋小坡侍御奇其文擢置高等是年舉于鄉會試報罷畱京師寓其師董怡園舍人宅成庵公歲寄數百金君布衣蔬食自奉甚約有招飲者邀觀劇者皆堅辭不往人疑其吝及造其寓則縹緗滿架如入書肆隨手翻閱均非舉子書問讀乎曰讀矣客不信試問之則應聲而對一日慨然曰知古不知今非士也乃日閱邸鈔通知時事復博采舊聞搜羅掌故

國朝二百年事朗若列眉與人談元元本本博雅者無以難之君嗜古成癖能鑒別真贗遇古刻及前人墨跡購之不惜重貲作小楷酷似樂毅論所書殿試卷從無錯落尤辨別字

畫酌古準今無纖毫沿譌者君負不羈才而試輒不利人勸就教職君意未決同舍陳玉珊激之曰君志在翰林薄縣令不爲今乃向縣令稱晚生耶君蹴然改容曰玉珊知我心也卒不就未幾而成庵公計書至時君在井陘急馳歸營祭葬畢自課二子讀長宗庠入泮尋食餼次宗膺亦聰穎應童試有聲甲申宗庠病歿己丑宗膺殤兩女俱適人數月內相繼夭折膝下孫男女各一男名嗣曾宗庠子也君強自排解嚴課之不稍姑息如成庵公訓已時人勸之曰君祇此一孫且幼稚宜愛養之今驟令苦讀恐將不堪君曰子孫不讀書縱極蕃衍與絕嗣無別吾願其學而死不願其嬉而生也自是人不復勸乙未會試鬚鬢白矣猶日寫殿試卷每晨起作時

澄城縣志

卷二十八

藝文七

七

藝一試帖一其文多驅策經史沈博絕麗時風氣頗尙清虛或嘲之曰花樣不同何自苦爲君忿然曰吾有機杼而已焉知花樣闡後應大挑已選列二等某親王以年貌不符舍之丙申力疾北上甫終場肩輿而歸閱月卒年五十有九病中語人曰吾昔畱京師得先君手札命援例爲中書吾恥以入貲得官未奉命又不屑俯就時壯年氣盛謂科第不足取今已矣回憶昔時鄙貲郎薄廣文皆自詒之戚也吾自悞不足惜顧何面目見吾父於九京言訖淚涔涔下聞者莫不酸鼻君性恬靜寡交遊俗客至則皺眉曰使吾少讀數卷書遇文字交則堅畱信宿盛肴饌出其書籍字畫共相欣賞數日無勗容雷季常時夏少孤貧隨其父執范孝廉館君族人家日

屑黑豆爲餅自以破鑊煮脫粟以給兩餐君見其文大奇之
以告成庵公居無何季常中副榜成庵公攜酒脯造之授五
十金曰聊給目前用異日赴禮部試勿憂資斧吾當獨任之
及季常舉孝廉成庵公卒矣時君已除服聞之曰吾父有遺
言吾不可以背之乃邀與北上行同車居同舍貲財共之略
不分畦町後季常成進士官甯國令常語人曰教我者范先
生也成我者成庵公父子也君赴義若渴而恥以富翁名縣
令有興作事嘗折簡招君君問使者同招者爲誰使者徧舉
以對皆邑之富人也君怒辭不往令知之乃先招諸富人異
日另治具請君與諸文人共議事君欣然往輒傾囊以輸秦
俗富室多起大屋尙雕鏤窮工極麗遇慶賀事必廣召優俳

澄城縣志

卷二十八

藝文七

三

君喟然曰習氣如此子弟安得佳朝邑張乾伯進士亦持此
論羣目爲不祥人君聞之曰吾願與乾伯同爲不祥人也君
家傳素樸而收藏之富甲于一郡子孫有善讀者閉戶而求
之足矣余門下士任子葆貞君之壻也述君事甚悉又云嗣
曾能讀書而性不嗜學意頗憂之余解之曰子不見農人之
蘆蓑乎雖有饑饉必有豐年成庵公父子其蘆蓑也勤矣天
之饑饉之也亦甚矣忍令其子孫長此饑饉哉嗣曾勉旃深
耕而熟耰禾其蓄以滋乎

論曰澄城連孝廉苦心孤詣人也自風氣屢變應試者多以
空疏售君獨博學好古不變于俗竟窮桂以終才命豈相妨
與抑吾秦中文運方晦盲否塞雖有通人不得顯於時與曩

者余官京師與四方賢者交時君寓董舍人家竟未獲覩面鄉之鉅公前輩亦未聞談及君者國有顏子而不知吾耳其不聰乎亦由君卓自樹立不求聞達也嗚呼惜矣

城固縣訓導任君墓志銘

路德

澄城任君諱仰伊字莘田嘉慶丙子科舉人以從兄延清君與余丁卯同年北上時相見於京邸端而虛勉而一心竊儀之閱二十餘年君命長子葆貞負笈宏道從余受業居四年次子葆淳亦至余門下健者大都能爲說理之文試以經義不免空疏至大典制大疑難如郊禘星律井田封建諸經之互有異同者鮮能洞徹源流辨證明確獨葆貞攷據精詳有經術氣非因陋就簡者比叩其所學則曩日趨庭時面承指

澄城縣志

卷二十八

藝文七

美

畫於君者也君幼時考衡山公口授小學四子書及詩書易妣葉太孺人卒君年十三方讀戴記手鈔喪禮一冊朝夕紬繹將師其意而行之遊泮後以家藏經注殘缺不完就學署借觀月易一函歸而讀之恆焚膏徹曙閱兩載而周目亦從此病矣表兄權未亨以君博覽經傳勸以由博反約潛心性命之旨君取儒先書徧施朱墨遇疑義錄之書眉蠶眠細字幾不能容邵陽鄒藜閣經師也尤深於禮經盛氏集編秦氏五禮通考俱能貫串其說君不時就正大得其切劘然君之於喪禮尤得諸肄習非專事口耳者藜閣亦自謂不如君應科歲試輒列高等提學陸平泉先生亟稱之有解經不窮之目及應禮部試謁見陸公公於稠衆中指之曰此關右經生

也繼母權太孺人卒君盡哀盡禮如喪葉太孺人衡山公老患嘔血堅不飲藥君徧閱本草食物擇其和榮衛而可於口者迭充餐餼未半年不藥而痊人比諸樂正子春之侍疾君自己卯報罷不赴會試者十餘年自是跣步弗離僮必親視一日爲公老友送葬未歸或以菜餠豆餅饌公勉嘗之夜發噉遂以不起壽八十有二君追痛自尤以棹材難得淹柩於堂冬月衰絰不鑪不裘逾禫期猶不御酒肉不出里門及營窆窆不徇俗尙一一酌諸禮經士論躋之君無兄弟有姊適張儀亭儀亭貧因久困童試將改業君勸止之是冬遂補邑庠子公燕就君受學飲食教誨與葆貞同居八年入庠乃歸葆貞妹曰荃君教之如子投女誠閨範諸書及笄富室爭約

君悉卻之以儀亭食貧力學字其季子大均君女弟適李氏而寡家亦中落君撫其孤仲春漸至成立從弟志伊幼從君學爲諸生未久夫婦相繼卒遺孤數歲無所依時君選城固訓導攜以往飲食教誨與葆淳同見之者疑其爲君少子也君師事邵陽雷香晚六年後香晚與君同榜遠近傳爲佳話及香晚歿君方居衡山公憂聞訃據苫大哭衰絰奔弔心喪之痛不止三年矣同邑張蘿谷先生肥遯洛濱著述甚富君命葆貞請於外舅連雪峰孝廉捐梓二種尋商諸邑紳公舉鄉賢其表微闡幽扶翼風化類如此訓葆貞以研經爲主曰人可經年不作文不可一日不讀書雖試期逼近惟日講經史數條古文唐詩各幾首人議其迂闊寡效弗恤也葆貞舉

庚子鄉試禮闈報罷省君於城固君問在都市何物葆貞以所購諸書對君喜語葆貞曰吾比年讀史頗有會心文章以龍門爲最誰不知之若上下古今洞然於人事得失之由廬陵五代史外它弗能及凡讀一史取歷朝比較之治亂興亡瞭如指掌異日持身應物泄官服政實基於此慎勿作斷爛朝報觀也吾目以讀經病以讀史瘳其拓我心胸也多矣君在城固與教諭王蔭三共事六年親如昆弟蔭三升延安教授揮淚而別臨別詩有知心追管鮑之句君之重義輕財亦可想已

國家以孝友睦嫻任恤教天下士民

聖諭廣訓十六條明白剴切人人能曉而所爲多相刺謬者

澄城縣志

卷二十八

藝文七

三

匪獨偏私爲害亦學力不足勝之耳君之質淳行篤其得力尤在明經漢儒之說經也博其失也駭宋儒之說經也精而於名物象數不無疏略君旣肆力於漢學復折衷於宋元以來諸儒之說不使之泛濫無歸故能措諸躬行非徒爲虛車之飾若喪服小記喪大記士喪禮旣夕士虞皆研究靡遺奉爲圭臬之數篇乃坊刻所刪截凡攻舉子業者終身不寓目者也天下事有所爲而爲者僞無所爲而爲者眞若君者其卽所謂君子儒者與惜乎所學未展竟以司鐸終也君嘗撰戚族數節婦事略仿明史宗室功臣諸表擬修家乘義例十餘條未及舉行疾終城固時壬寅四月十一日距生於乾隆四十九年七月十一日年五十有九配白孺人子葆貞葆淳

孫悟今將於道光二十五年十二月二十二日巳時葬所居安里村之西新塋壬山丙向葆貞自澄城來請爲納幽之文余畱與其飯辭蓋猶未御酒肉也嗚呼此可見君之身教矣葆貞撰行狀五六千言凡君嘉言懿行及官城固事敘次精核余無以易之爰撮其要者爲志而繫以銘銘曰漢立經學鴻儒代興人誦以口君服以膺匪科第是登惟矩矱是憑若考作室孰敢不承自茲以往子孫繩繩以施於雲仍

太學生毅齋馬公遺事傳

田潤

公諱庶字若林號毅齋澄城太學生自先世以來累代素封能以績學好善見稱鄉里公仰承先緒光而大之遂爲邑中望族於時公歿十七年矣而哲孫子緇寶書成進士授縣令

澄城縣志

卷二十八

藝文七

禿

分發四川將之官囑余載筆紀公遺事公之貽謀啟後與子緇之顯親揚名猗歟盛矣公幼慧喜讀書遇事能斷未弱冠卽肩家政督耕治產辛苦備嘗內奉慈闈甘旨外勗昆季讀書殫盡心力克敦孝友嗣議析箸公乃出先年所藏鏹數千兩與一兄一弟均分不少私室廬衣物尤多推讓其公廉如此旣而委釋家務以幼孫負姿英異冀其大成遂乃構精舍延名師酒食必潔必豐禮貌必誠必敬晨起有時晚歸有節又見兩孫學業日變月化矍鑠老翁喜不自勝每論說詩書旨趣輒眉飛色舞津津不置口然生計亦自此漸替矣公卒於道光九年八月初一日時年五十有九易簣時謂其子曰爲人先品詣次學問又言兩孫日後須與正人益友相處餘

無他囑公元配彭太孺人治家整肅有二子長諸生方臯字贊臣早卒次諸生倚待字試言則子細之尊人也繼室劉孺人又繼王孺人現存有名家風範子細弟寶善諸生當繼起者

論曰觀公生平處家作事似若粥粥無能者然而於析產不計較有無於讀書則深致崇敬可不謂重本輕末者乎語曰根之深者其枝遂膏之沃者其光昌距公歿僅十餘年而昌大之報如此世每謂天道無知吾不信也

業善鎮創建義學碑記

古無義學之名宋元以後義田義倉外復有義學要皆制定於官師延於上仿黨庠術序之濶爲化民成俗之地學制猶

澄城縣志

卷二十八

藝文七

三

近古也沿及後世都邑各建書院以教士子下至窮鄉僻壤則令民間自爲籌畫建塾延師教其子弟於是富紳巨商出其餘貲以立學舍或爲沽名或爲徼福義各有在幾於鄉有其學矣夫義者利之反學而繫之以義果能存心利物以濟鄉里易曰利物足以合義則學也而義存其中矣若如所謂沽名徼福亦不過齊馮煖市義之狡術耳龔義之名亡義之實惡在其爲學余甚惑焉未敢以質人也歲庚戌夏縣大夫金公招修邑志披覽之餘見吾澂各鄉義學不一而足心竊儀之時又有業善鎮李鄧氏呈伊夫創建義學事縣大夫旣允所請畀余彙纂入志退而詢之所識李生華國生日吾族也且與屬焉吾知之翁名廷彥字德碩先世有以純孝旌者

翁其裔也世爲農閒業商家漸饒裕年五十餘艱於嗣偶病
知不起出千金召族子翼清象謙及余華國謀於鎮西舊有
市廛創建學舍并置地租延師以教族子弟之貧不能讀者
屬余三人董其事且誠其室曰吾願已久今病且死又無所
生及其未嗣也蚤爲之所不然恐他人入室不吾償也余三
人者受而識之弗敢忘今年春其室鄧克承夫志復申前說
迺爲鳩工庀材基址不足則擴之垣墉弗飭則築之廛臨闕
闕兩傍仍設市肆中建大門二門各一櫺進內亭三櫺廈房
前後十六櫺最後講堂三櫺共二十餘櫺門闔甃以次畢具
計共費白金千壹百有奇而延師尙缺如幸鄧亦知大義復
割良田五十畝餘以充束脩膏火之用而義學於是乎成吾

澄城縣志

卷二十八

藝文七

三

三人者亦可息肩矣受任以來手拮据而口卒瘁亦旣嘖有
煩言今將藏事丐公一言以紀巔末余曰如子言可謂義舉
矣太史公傳貨殖所稱好行其德者不當如是耶或曰李無
子初蓄此願藉以徼福旣而將死知無益也而卒成其志以
博身後之名李亦狡哉余曰然然李富不埒王侯賢不出里
巷生晚近之世迨身歿之時猶思興此義舉以若所爲聿求
厥福固無望已卽眞爲名亦以千餘金而市美名矣矧夫名
者實之歸也李生平善行殆不可知今也義學旣立吾知族
人子弟濡濡煦煦相與詩書絃誦於其中數世而後均食舊
德光家乘載史冊名垂不朽德惠長留李實兼之謂之狡而
賢也可足紀已李卒於己酉歲秋三族人卽興工於庚戌

春仲訖辛亥二月落成因其請撮舉大略俾鐫諸石並爲著義學之義以爲世之好行其德者進一解云

雷書臺先生墓表

安慶 戴漢翔

道光乙巳余司諭太和而雷雲峰時夏先令是邑治多有聲余甚契之接見間相與道家世爲余述其尊甫書臺先生早年棄養時夏年僅十三齡幼無知識粗治葬事而挺道之文未具每一敘及輒嗚咽流涕今

上御極得膺保薦奉

旨陞授河南光州知州辛亥春將之新任命長子森旋里修墓乞余爲文而貞諸璫按先生諱校號書臺行五陝西澄城縣廩生祖宜泰父聞堂俱有隱德以淑行聞先生生而清癯

澄城縣志

卷二十八

藝文七

三

幼卽勤苦力學工舉子業能勃率爲理窟甫弱冠補邑諸生試輒高等旋食廩餼先生益自刻厲篝鐙夜讀漏下五鼓猶伊唔不絕聲以故有聲庠序學使督陝中者閱先生文咸擊節歎賞然性沈毅不喜浮華矩步規行造次必於儒者耿介不苟取雖家徒四壁蕭然也鄉黨以此重先生四方向學之士雲合響應爭出其門下得其意者無不破壁飛去而先生屢躓棘闈曾不得一第遂抱抑鬱年未五十邁疾不起易簣時執時夏手屬曰今後汝必讀書雖忍饑寒不可輟業將來成名以遂予志言訖而沒夫以先生敦品積學宜其愿金門上玉堂取青紫如拾芥而竟天奪之算僅以諸生終噫何報施之爽也旣思史傳所載若漢胡伯始致位公相匡稚圭及

